

由庚堂集

由庚堂集卷之三十三

縉雲鄭汝璧邦章甫著

書牘

曾健所廷尉

門下竟歸耶歸而後見門下惟是民萌未卽
受福動關主德爲可念爾夫用我者而豈徒
哉直抒所學無惡于志不則龍蟄安身今門
下獲其志矣六月之息一朝霖雨其道大光

盖日望之焉不佞謬撫東土災祲異常納溝
是耻幸而竣事又嚴海警矣惟日兢兢懼負
友生門下好我其真切教之伯仲一堂尚友
千古精進復無量以詔鄙人尤所願焉

王秋澄選部

伏承報劄恍焉面命不佞山居十年出處之
間頗亦自審竊謂士君子處則脩己繕性須
滌念于榮枯出則一志奉公宜忘情于利鈍

以故杜門却掃絕問長安誤辱推轂忽起陳
人矢圖報荅以白平生此其時也亦其心也
初起井陘老親在侍疏控逡巡繼聞調命卽
日就道意欲隨地練磨用覘實際敢辭艱遠
令窺行藏且貽避事之誚乎自四月入境以
來提衡將吏推心披膽覺有一種精神心誠
求之不敢謂無寸裨惟是絕塞苦寒恐蒲柳
不能禁爾頃閱邸報叨推中州督學固知廟

堂不我鄙夷深用感激然汗下息且悚矣夫
邊臣職在備邊豈軍旅猥曰未學而造士輒
謂能之乎文武爲憲妄及么麼祇增讟戾耳
恃愛敢佈腹心倘容其畢力防秋少效萬一
大計幸脫徼比得歸省養不惟愚分獲安卽
事體亦妥惟門下亮之

又

適接邸報知門下以舉直讜言忤旨而奪之

官不佞不勝錯愕夫以門下之碩節壹志爲
國遑恤其它貶竽流竄知不足爲門下林以
門下之精誠直信本心力扶世道浮名峻譽
知不足爲門下榮一身似葉千古爲龍卽不
佞猥鄙亦無效謏于門下而顧耿耿深爲世
慮也盖自近來門下正色立朝鏡衡庶品主
持公議大稱物情而仕路漸清正人彙進中
外喁喁且有太平之望乃今一不當上意倏

然去國雷霆震懼黃閣難于調停省署難于
批逆卽後賢相繼展布惟艱正士慘顏材臣
束手寧不增杞人之憂乎知門下亦重爲斯
念也若不佞私衷則尤怵怵動焉竊聞知人
者與知於人者交相重也不佞鹿鹿無狀門
下不以爲不肖而推轂之謬稱知己今門下
有芳舉天下以爲華而不佞得稱于人曰此
知我者是門下爲不佞重而自惟株守塊立

上之不能伏闕鳴閭冀回天聽次之不能解
印相從趨步高躅下之不能展籌樹績出萬
一之奇以徼尺寸不貽門下齒頰之差是不
佞無能爲門下重而徒引門下爲重也雖然
丈夫相知以心浮沉何與不佞敢不勉圖倘
徼惠在公寧計利鈍不者返我初服繕性葆
和無失故步是所爲報耳握叩無繇中心悵
結輒馳佈下衷于執事者不敢效世款語惟

門下崇鑒

周耿西中丞

頃候未展覲縷使者儼然翰惠之辱感媿交集矣盥讀佳刻恍然自失者久之才須學也兼才已難而原本問學則難之難者門下家學自尊公先生而天才卓犖若有神解以故文武經緯游刃恢恢錦心時發動入三昧足列不朽之林未可與世儒道也鹿鹿如璧伏

野十載無能明千秋之業起家兩塞無能揚
萬里之勲雞肋自厭鵠嚇何爲惟是丘壑靜
觀頗見端倪金革磨練覺有奏泊卽且乞身
長往究竟此事以畢初願非久門下建牙兩
浙不佞負笈轅門請以山人見吐露底裏揚
扞大業用慰平生嚮往之懷門下能無許我
乎

梁霖字方伯

白登一晤閭門再晤今遂三禩餘懷心不可
復道世實需才別之盤錯惟門下高標偉略
天津茂績借之遼左誠以遼非門下不可建
牙權輿榮進素定無足爲倭顧丈夫事業掀
揭天日令世知真才作用自別足爲知己稱
快爾倭虜交訌時勢良難而虜切近尤足慮
遼鎮疲不能支宣大山西稍寧謂挑精銳一
二萬協遼遇倭禦倭遇虜禦虜始克有濟而

邊鄙蕭條生氣未復更煩休嘆也山左車輔
之倚願安承教惟詔之

梅瓊字叅知

門下信心獨逞盖有千古之嗜仙班清史不
當以簿書勞也夷門萍梗得締金蘭幸矣倥
偬出塞交臂相失流沙白草輒深離索之懷
則取門下出塞歌歌之黃雲不流青天爲濶
始爽然適已又黯然咽也萬里秦蜀會晤無

繇頃因望中子一佈區區顧不知何時達乃
使者從天而下開械緣字如見顏色盈庭品
幣復戢情文之周至序我二谷則喜焉欲狂
擊音和之天籟而託重丘言于玄晏之敘將
遂增色人間此之爲德百朋不足珍而十襲
爲淺也齊魯名區肩之薄劣其何能爲役高
高泰岱泱泱東海誠表大觀而受事以來蒿
目兵荒無敢出一語今聆贈篇小巫氣更索

爾然一擊節海岳爲動也肅因使者西鄉稱
謝不盡一一

許少微京兆

不佞鹿鹿無似惟是寤寐賢豪若其至性蓋
自通藉二十六年睹記風議之英而竊有慕
于下執事者夫官而言寄也必丰神凝定而
後出之安必國體通達而後裁之中必是非
以理訶讚無心而後受者服而聽者聳不佞

竊讀大疏言言由衷卽言言中繁也時而悚
然時而快然朝端何幸有此深爲國是慶矣
不佞山澤骯髒陳人一旦起而爲疆場拮据
之吏長安聞問缺焉以故心慕如門下亦未
通咫尺之問已而自念异代有人且願爲執
鞭豈其以榆梓密邇之誼而過爲引遜廼敢
以間奏記佈其景悰若此不佞疆吏也備兵
飭戰苟安吾圉敢不重圖唯是南土蒲姿前

後出塞周馳萬里風氣不調日抱豐艸之思
思無足爲鄉國效者門下何以教之

江續石中丞

有懷如縷期傾吐湖山間乃迫畏簡書凌遽
西征遂負初想接手教知同此懷也榆林將
數士伍忠勇甲於九邊近來疲殘稍致携貳
其故難言已鄙謗如不佞何能爲役顧耿耿
寸丹敢不重圖報塞世日多事杞憂緯恤不

獨在邊陲大丈夫功成身逸繕性完名自是
勝事第上天生賢有意那得便許長往任緣
直展果不可爲何俟終日海寓苦無多人仁
丈樹勛旂常世藉若鼎呂政未可作東山想
耳不敏麋性蒲姿仙都愚谷足以老我守障
如幸無事卽尋初服維時仁丈筦銓樞復未
得把臂以茲益悵斯會之參商也率佈曠衷

願言加玉

顧涇陽文選

聞近事不自得者累日門下千仞若增何足
滑和如世道何亟馳小簡都中問訊乃報台
旌已出春明仁賢一空主德可念矣謹遣介
佈衷而具一餐犒從者不敢長具恃道愛也
不敏夢懸仙都間業將有請而以封貢報罷
不敢遽顧以蚤負何如螻蟻近復怍怍動矣
幸門下教之并以東土無狀狀直詔令知所

省焉

楊韶水年丈

丁卯附驥來三紀于茲矣兩家兒子少者亦
且稱父那不速老而握手未能聞問多濶念
之黯然想仁兄同此懷也惟仁兄戢鳴陽之
羽爲六月之息海內仰其丰采二三郎君玉
樹崢嶸扶搖比翼復足愉快得之倪丈謂仁
兄味出世之旨超上乘而印真宗政恐寓內

牢騷須仗高賢幹濟何得便脫塵外然出世
方可經世掀揭之業此爲權輿世人畢心齟
齬與放浪頑空均未究竟知仁兄於此大有
入矣不敏弟一丘未穩小草生慙唯是白門
風物故佳奉常清曠頗稱吏隱之適暫爾畱
連耳山陰道上安可少放兩屐俟明夏滿考
過憇西湖扁舟相訪此其時也輒作此相聞
炎暑困人語不能悉惟仁兄心炤

王太初臚卿

不佞心飛親舍伏俟歸里可償夙約止念冥
心近更有省天台仙都間合併何時跂余望
之矣山左海上之備覺就實際民間元氣漸
培島田已舉墾闢萬畝收粟數千利賴頗弘
也臨清中原要害增兵脩城部覆詳議愚意
今日民窮財誑不得以兵而病民預計周防
又不得不爲民而足兵欲分標兵千人及該

道衛兵共足三千人免再募餉卽作外標營
領以名將駐臨清與省下標營三千相爲表
裏士馬不許占差無事彈消意外有事應援
四方庶幾先雨之謀惟是脩城費鉅倘畱關
稅一年亦可輟舉若衛河可避運河可闢俱
非難處也入山之人不應復掛第承平日久
臨清重地似宜加意周防一念耿耿不能自
已稍發其端以需賢者門下能無意乎惟一

一詔之

李雙溪憲副

不敏南國窳窳之夫也一旦起家而走塞徼
蹙然蹙戾是虞屬有天幸門下不鄙夷而弟
視之諸所誨翼披之肝府飲餗煦沫同之挾
纘坐春風而忘秋瑟惟此百骸之無化于柳
肘而幸今日也則門下以耳一入東土卽輳
兵荒自冬徂夏枕不安臥食不下咽而嗷嗷

待哺之衆接目而駭心蓋煮賑者六百萬人
腸一日百迴往臨視之也齊魯故稱中原乎
而焦勞百倍戎馬矣以故不能遽肅一介訊
謝明惠豈其有胸無心若此而踈節奪之閔
凶門下或索之骸外爾今辛麥熟席稍帖輒
馳候典記者道其耿耿惟門下垂炤焉

何霽寰太守

鄴下傾蓋不佞心鄉往門下門下亦遂知有

不佞以第一理相期今且十年往矣萍踪駒
隙尺素多阻何問握手驩日者不佞起家過
毘陵以期程宵度不及訊門下起居迄今悵
結忽拜手教如承顏色然頗怪門下不善宦
而善病又聞門下從敝牀高士暢其玄旨善
自葆調今且日健步矣天寔生材濟世終不
令門下韞未竟之緒而懷之願加餐自愛不
佞踈鹵亡當世用退而尚羊仙都愚谷間遊

方之外頗喻適志亦稍有省窺頃以小草辭
而竟不得就列容臺半襖矣時事大不堪着
耳以不出位思思尚省爾課子讀書則時猶
在念兒輩幸師董君不佞因借潤千頃大自
愉快敝枯蕞爾祇一處士星門下摩手得之
不佞採珠龍淵乃以爲貪耶盈盈一水晤對
何時附此謝記存金候提履不盡願言需之
嗣佈

于念東納言

不佞何脩得當大君子白下追隨披襟脫跡
驪不可爲喻一朝別去把袂畱連方舟濟河
而歌三疊行雲欲駐黯澹何言比出塞聽音
益稀滿目流沙犬羊當戶始信清福不易享
嘉會不可長猶恨聚首時之草草也奉常倅
來得手教恍承謦咳至傲我鍾雲淮月益令
人神飛矣老丈乘薰晝遊客與適園御秋風

而聽長樂嵩呼旣畢從諸大夫賦帝京明月
之篇能無鬯乎亦記及邊塞征人不也山中
人日夕夢山中仙都文且移至得徼西陲稍
謐便奉而往矣序佳集敢虛命顧自叨轉後
曾無片晷之暇氣又以大巫索今從絕塞風
塵吟嘯中那得成語聊以塞委而已薄具奉
犒剗氏惟麾內教之

洪詡韋憲長

天闢蘓薪重上臣事君之誼風宣屏翰羨清
朝許國之猷成蹊妙於不言徹土先乎未事
士萌驩睹文武流光恭惟門下斗嶽鴻名絲
綸大業聲爲律身爲度倫慮垂佩韋之模居
之安資之深溫知裕洪鍾之叩收會稽之竹
箭桃李公門貢南國之鏐金琳瑯天府始操
冰鑑士空羣于九方旋拜簡書帝終惠于兩
浙臯皮夙擁華省新開俎豆韜鈴壯觀東南

之壁干戈禮樂儲收社稷之勛昔賢每乏兼
長今日快瞻具美恢張宏略早建制府之牙
杼展嘉謀時司台衡之鉉不佞分陰宇下望
斗周南慕闕里之光塵瞠乎後步御龍門之
清轡願爲執鞭賢宮榮世澤于先人膠庠進
青衿于豎子存胷蒙休腑肝志戢拘踪白下
未貢悃于戔戔翹首浙東殊搖心于耿耿敬
走一介用佈寸衷

又

念惟鄉賢重典也而舉自大君子則益重然
世未易值也璧璞邀藉先大父遺澤幸有今
日而以不肖眚竄之身甚慙于長無足爲大
父重惟大父行誼在鄉邦鄉邦人士願得而
俎豆之日久矣而不肖則思念何緣得出自
當世大君子之門是幸恭惟門下振河汾考
亭之緒握昌黎廬陵之鑑身標爲度文吐爲

經旌勸所加九幽爲耀世人冀承一顧而不
可俛得而先大父適以郡邑之請辱門下俞
而秩之瞽宗珠璣陸離言言華袞檄下之日
郡邑人人快大父之稱祀典而不肖則深幸
出自大君子之門爲希世邁也歿者荷而存
者報顧不肖安所爲報惟斤斤飭履日率子
孫孝弟力田好行其德世世毋忘門下風勸
揚厲之盛心而已株拘白門未能叩臺端百

頓道銜鏤之衷復不敢具戔戔溷掃門之禁
謹勒狀記室而蕪陋不展區區主臣茲甚惟
門下崇炤焉

鍾龍源給諫

夫邊事難言矣一切罷貢市收真夷集壯夫
而練士馬舉燒荒搗巢之故事豈不快心然
而勢有難於卒就者何也九邊罷則俱罷俱
罷則俱變而大入犯入犯必不能禦而虜大

肆虜大肆則內懼而悔且復幸其和彼肆則
必要挾而不能守故約譬如虛辱之夫倒腸
忽仆而咎醫之無良也如欲爲此必賢相主
之於上本兵持之於中九邊各有人效之於
外而後可今詎遽能乎戰兵鎮以千計路以
百計卽所稱戰者非已戰者也糧不足半年
將不拔得十五其何以應卒故如虺羸之人
參朮可漸進而硝黃難速下也蓋二十年之

釀成一旦不易起爾爲今之計須是從一畫
上寫起練一兵必真是一兵買一馬須真是
一馬用一將須真是一將不在揮霍而在真
實不可鹵莽而在細密不可急近名而亦不
可需徐效卽以本鎮論以二十五萬金不得
已委之於壑矣此外積一分則以一分爲兵
食之圖庫中所積尚二十萬以之添兵置餉
而日訓練焉始克有濟爾大都在 廟堂有

定見有定議邊臣有真心有同心未有不可爲者也幸明教之

又

近生榛棘慙負知己而門下獨慨然信其無他枉使慰問篤誼甚高自念何修猶然未棄于大君子之側卽衆鑠奚顧哉夫讚訶自外惟神明不可誑不佞以身爲鏡往者兩京九卿臺省如耿楚侗孫立峰諸長者尉薦暨門

下閱邊諸公特敘前後逾三十章反而省之
生平或有一二可取而疏揚者一事無之比
遭三至反而省之生平踈子多管而所指謫
亦一事無之以是知牛馬隨呼無足滑我靈
府也不佞多病老親望八菽水木石實獲我
心無可怨尤何庸芥滯旦夕釋負南歸尚羊
容與仙都台宕間有一男子披雲而侶鶴者
必鄭生也其以此報門下或不終負門下徵

收錢糧冊附覽兵餉十數萬已題減過半倘
東人免橫徵不佞瓠落甘之矣

吳瀛海直指

承教以出塞之捷督撫敘及不肖惟此將士
之力不肖不敢任功盖不肖親悉戰陣之艱
矣將士出一生于萬死其扶傷歸者備聞其
狀足流涕也夫賞功安得不厚將士耶道臣
其敢貪之至於修守之具保斂之方則專道

與有苦心焉卽地方微有失槩及道臣亦不敢任罪何者鞭長不及馬腹吾心力已畢殫不能逆於勢之所不及也夫功罪亦難言矣邊牆以標界耳安足恃也賊拆牆而入聞者訝之不知數百里長邊無乘障之卒無可守之障卽韓白不能使之無入也一入則墩軍受攻勢不能救何者墩孤立于高阜衆賊擁千百攻數卒我兵在下莫得仰援昔人所稱

墩軍與虜共者也惟是卒不在墩則守瞭不
備宜問主者卽在墩而有踈失應分別所以
而實陳之難苛責也今一槩坐之此邊將所
以營求貢市之地不敢當戰守之區以彼有
功而無罪此非斬獲卽一有損傷皆罪狀矣
其守禦之勞不得準也此邊臣所不敢言直
指所不能悉而本兵之所宜知者也如以實
卽有損傷薄其罪責邊人始有固志耳偶有

所概敬一及之餘不贅

倪禹同選部

鄉以入都渥承款眷邇瞻榮晉大快跂衷然
思干掃門之禁未敢具戔戔佈下私乃門下
推署雅而存記之廷推則與部推則與寧不
知銘戢而亦不敢以私謝知門下亮而寬之
也銓事日難自門下秉衡布公履正天下讀
其疏想望風采吏治人心幸甚竊惟命關上

簡者安能取必而自由啓事者可得品衡南北無泄忘燠涼無軒輊則惟門下能耳近日作用大端睹矣輒因太學代庖循掌故奏記敢佈腹心以佐門下平明之盛非故緩頰也幸財啓焉

黃慎軒宮諭

長安晤承聲咳白下時領教言自謂三生之幸道駕西征峨眉天際音問遂踈何論促膝

念之黯然惟此大事是血性男子所能擔荷
福慧究竟則天實成之世之從事者欲於功
名富貴俛兼得焉願力不雄功行未密如隔
日癰進退已自有漏而造物弄人牽之世路
亦每每若牖若塞因循墮落與不著察者等
爾門下根器元大發心復猛力與願齊體從
慧達自是再來人近復予告靜修直入了了
無疑寔默有玉成焉者將標楷契類開示塵

迷不知可分一滴施及渴者否不敏肩重衝
邊遠去知己慙生鄙吝唯是耿耿猶存矻矻
尚奮望六之年隙駒是惕朝胡以聞夕胡以
可不作生死無生死解似覺直截而未能撤
手懸崖敬請正于門下幸披近得明以教我
卽圖入山究竟不敢負知誨也昨歲晤蓮公
夷密平等大不似近之虛憍者湖山幸有斯
人語中獨念門下不置聚首何時徒有瞻跂

薄具聊佐齋供別楮與洒真言西望詹懸爲
道加玉

陶石簣太史

往以代言煩下執事辱惠華袞于二尊人九
幽爲耀銜鏤世世無敢忘也至獎借不敏溢
不可任媿浮于戢矣自違磬欬鄙吝日生惟
一念嚮往不敢食息置讀應天錄恍焉面命
竊有省也經正民興發自鄉愿孔孟衛道之

旨抉揚殆盡所裨世道不尠朝聞夕可尼父
契緊爲人吾儕忘已大事而飾櫝說鈴饒饒
何爲者若無若虛知生知死忽焉弗思抑惑
之甚矣門下竣事過里閭曾詣雲栖否昨歲
晤于西湖益平淡無著政可念也真修實際
門下近當精進可令遠人聞乎不敏金革練
磨犬羊狎邇足儘徵心何時就正存之目擊
幾幾望之西充丈入山益深詣當仁量豈天

成之耶率爾聞問不展覲縷惟心炤

王紱山太史

不佞自尊叔和石年丈講世之誼得幸於尊
公老先生自爲郎迄今二十七年所矣惟尊
公爲國元老載出定皇儲講學而今奉太母
還里也君臣之誼母子之親出處之節完而
旋履近所希有矣未竟之緒挈而付之足下
蓋自足下舞象時尊叔已爲不佞道吾兄有

子也而今足下軒軒振羽式穀似之相門家
學大業敬承復爲世所希有願足下毋讓不
佞跂予望之矣然以尊公秉相而不佞不敢
引姓名于足下乃今尊公過濟上與足下俱
而不佞不能走謁且就足下譚也亡論世雅
如地主何輒道其耿耿若此不腆犒從者盖
輶褻而近情慤惟足下鑒存

又

不佞叨在講世傾慕平生而未時請益卽濟
上聞問嗣亦濶焉乃胷中時著王先生也自
世丈登上第僉以象賢爲高門慶不佞則惟
國家得一人焉撐持宇宙而光大相公欲爲
必竟之業爲社稷慶夫今天下不無事矣安
危惟所任調贊仔肩總歸爰立而居常輒引
遜謂始念不及此夾袋無聞前箸罕借一旦
當事任或未盡副輿望則國何賴焉惟世丈

日奉庭訓綠野中經綸已預持此大作知軼
尋常萬萬爾竊以第一理相期願世丈之無
虛此日也不佞用世無當一丘未穩近復出
塞安攘罔效不思負世人思負相公與世丈
也初擬奉常滿考從容謁相公函丈瞻叔丈
松楸就世丈十日譚不意僦遽西征迫于期
程卽馳一介稱壽邊鄙業已後時延結何喻
惟世丈道之相公前毋訶而進焉幸甚

田博真都諫

報役奏記辱手箋獎借過情媿戢甚也邊計
入矚照若觀火不敏甫至得藉手振理庶幾
不溺于職敢不竭蹶重圖之套虜曩雖定款
然諸黠酋未就市也卜莊明之後至寔將恃
馬壯爲要挾計拂之生釁狗之長驕惟守我
經制脩我戰備以禦彼之押闔如是則款不
則戰此疆吏事也漢過不先忠信待之彼肆

無厭直則在我而愾自壯因機導窾要以固
吾圉而已芻昧無當惟門下更端示之

朱密所侍御

不敏天幸得從門下遊竊見門下體國真誠
任事精亮挾中綮要不動聲色而裨挽宏多
不敏私心跂焉謂賢者自別顧益殊深蓋奉
違半襍無日不馳左右也寓內卽牢騷得人
尚可爲要以才與誠合隨地有濟今中原多

故全藉邊圉救寧乃免露肘不敏疆吏也修
戰以維款縻款以飭戰款塞盛事也而詘國
體以徇犬羊則非犁庭美績也而徼功名以
啓釁孽則非馭虜示之恩信整備懾之兵威
榆陽勁卒甲于九邊日鼓舞焉銳氣稍奮虜
亦不敢跳梁而就疆勒皆夙稟緒誨敢忘佩
戢耶率爾附及並請指示計吏以所部馳報
餘不具宣

蔡虛臺儀部

往尊公時語不佞我二郎必做私心識之已
而世丈登庸荪焉姱節乃一見踰于所聞不
獨慶通家有喆嗣慶國有偉人也入都渥承
顧惠南旋未有以謝聞正席儀部固不佞舊
遊也藩封黷政關係甚鉅得高賢王之制典
風教犁然飭新喜跂仁量顧海內願得爲師
而敝浙望之若歲倘不鄙湖山俯垂憲節天

造敝藩多士興起不佞且爲桑梓引領矣近
不佞視篆南雍有掌故上狀輒奏記左右南
雍諸生日月已滿須實咨至方送南銓撥歷
不則終歲淹焉近查諸生咨有久未至者桂
玉殊苦且起他端每以請咨藉口索費惟明
公在事知必速發顧中間壅閣尚不知所歸
幸明公查詰得其壅端而著爲常期憶不佞
往在儀部時曾限以文到應實咨者三日內

發遲則詰主者知明公不啻速耳敢爲諸生
請惟亮啓

徐荊州

門下震世才也白下晤承殷殷鄉逞焉乃門
下亦不鄙夷而好我五馬驂驪倥傯別去意
殊戀戀也岳陽非大賢路業已誦之今果然
矣荊州用武之區自昔稱劇日者貂璫蠡出
杼柚多艱得借門下之重而臥護之指揮填

歷不吐茹而豪貴歛手比屋帖席荊州牧之
爲建牙權輿也蓋地以人重哉白下停雲有
遐歧焉輒因便鴻題尺一聞問并有所陳在
昔江陵相公輔聖主於冲齡委裘而天下
晏如功勩在國天嫉其盈身家作臯遂狼狽
至此今時事紛拏才臣詘于回天而智士窮
于籌箸能無昔人之思乎聞其子若孫委頓
編氓幽憂如擣似亦足憐惟門下俶儻慈仁

知必加憫不敏山中踈子之夫於相門曾無
紹介之素一旦掄才忽被賞識正言調諍亦
每動色降心中多劑幹後因其子弟在試不
敏力辭禮闈分校之役卽稍見忤謫外放歸
然天日鑒衷知我有在竊念氣勢摧敗之餘
盡操戈而誰報飢辱門下高誼敢爲後人邀
一睎之恩惟門下加意不啻不敏身被之也
不敏於二子及第時一刺未通茲爲冒懇知

門下亦獲不敏之衷矣率勒不次焉楮詹懸

由庚堂集卷之三十三終

由庚堂集卷之三十四

縉雲鄭汝璧邦章

印

雜著

王襄敏公疏草卷

肅皇帝操下廩廩數用不測繩疆場大吏而
金陵王襄敏公猷受知眷以勛名終余嘗讀
其疏奏纚纚石畫精神足副其風議此卷則
公侍御時三劄艸也當是時郭武定侯勛貴

倨無人臣禮公逆折其萌因祀事首論勛驕
蹇狀後勛竟中法如公言世稱公先見云昔
柳誠懸筆諫本之心正世傳顏魯公爭坐位
帖勃勃生氣公矢手起草遒勁莊肅如其人
詞翰與勳猷竝美可不稱具美哉夫君子澤
厘五世而手澤百世長公太常簿好德而文
卽先人隻字重之若敦鼎以此貽穀百世可
知矣爲題而歸之令王氏子孫世知所珍焉

賓陽圖引

環繒之山而勝者仙都環仙都之勝而勝者
初陽谷余內弟樊次公季思愛而樂之因自
號賓陽子云夫人生借日光而騁駒隙卽百
年猶過客也奚足以爲主然以吾生百年有
盡之景而役于日則日爲主而我爲賓以吾
生無盡之精而御日則日爲賓而我爲主
公儻進于是則稱賓陽子固宜於是賓陽子

行年甫四十余仲子士毅其館甥也聽請詞
爲酌者先而賓賜子辭焉曰恒言不敢齒而
胡以祝也余曰固也然禮有之請祝以所聞
余聞書志寅賓詩咏如升易稱得天而久照
虔始而貞陽惠純矣齡遐無筭也賓賜子才
而有致日與余暨二三君子遊始鬯情于於
謳而懌中專精于絃誦而和旣且遊神于方
之內外而怡然以釋遂卜築紫芝塢而永日

遨焉卽強仕方駸而志趣洵遠矣計今于日
其賓之初筵乎而升而久來茲未艾請以是
祝且以是勗乃繪之圖而系以歌

余官南奉常毅兒從焉親師孫學余嘉
其志之適上也有餉余碧玉環者爲之
銘而予之

蒼蒼者其正色耶鏗鏗者其絳聲耶磨不加
瑩雕不增文循循而無端者其質有而德之

呈耶女器也而瑚璉于廷不器耶天行而粹以精其將以女能耶而余日視女之成耶

題仙客林生小像生工染翰而跛能履

余綴數語供一粲焉

得心而應之手者其郢人之斤耶蹢躅而踣于行
者其存不足喪凡君耶時舞時蹈任姁任妍隤然
嗒然而莫知其所以然者其洗以善而索之形骸之
先耶噫是何人耶豈其畸

于人而入乎寥天者耶

愚公洞銘

爾體也實竅之而虛余生也知沌之而愚虛
今若愚愚今還虛惟余與爾億禩其俱

跋聖孩字說

塵樊火宅造物小兒子之氣而鼓之闔揆着
便發觸之卽焦迷真逐妄念浪排山徵色發
聲忙手亂脚如乳孺搏戲于沙中醉漢嗔顛

于市上旁觀足博一喙事移緣散愧天忤人
無處可施面目惟聖者一切孩之犯而不校
怒亦不遷大劑清涼稱安樂法矣黃君伯虛
卓識深心有概物態別字聖孩顧而思義用
比弦韋濯濯火蓮亦一快事著說已自分明
復請余下一轉語余則何言雖然創前艾後
生東沒西縱有滌磨猶是緣影邊事廓然無
聖泊乎未孩請看未發以前何處安身何方

撒手鑽木出火得大自在方爲究竟且斷葛
滕目擊之它日

唐琴轍銘

爾質隕然亦孔之厚爾中窅然虛而不有爾
韻鏗然有孚盈缶億萬斯季高山爲友